

OPENINGSREDE VAN ONS PRESIDENT

Hier op die vooraand van Sawa se 50ste verjaardag kan ek nie anders om terug te dink aan die jaar 1974 toe ek en Sarie by Sawa aangesluit het en hoe ons Sawa ervaar het daardie tyd teenoor nou. Ek onthou nog goed dat na aansluiting ons eerste Sawa ervaring 'n kenmekaar geleentheid was by Germiston meer waar ek en Sarie sowel as Willem en Ryna Gerber as nuwelinge ons eerste blootstelling met Sawa ervaar het. (Jammer ons tradisionele kenmekaar geleenthede het uitgesterf.)

As ek eerlik moet wees moet ek erken dat Sawa nie baie verander het nie. Streke het wel kleiner geword en die eksterne omgewing het verander en ek kan nog goed onthou hoe die Sawanante mekaar gespot het met die soort woonwa wat elkeen besit het.

As jy 'n Jurgens besit het , het jy 'n "woonwa" gehad. Die Sawanante wat 'n Sprite of Gypsey besit het , het 'n "Caravan" gehad. Die kwaliteit van woonwaens was ook nog die vervaardiger se trots.

Daardie tyd was woonwaparktariewe goedkoop en het ons maklik .50 sent per nag vir 'n woonwa staanplek betaal. Dit was die era van V8 Ranchero en Chev Elcamino bakkies . Brandstof was bekostigbaar en ons het nie geweet van tolhek tariewe nie.

Ek dink ook onwillekeurig terug aan die tydperk vanaf 1981 tot 1988 wat bekend gestaan het as Sawa se tienerjare. Op 30 Mei 1981 het Sawa bestaan uit 11 streke waarvan Vaalrivier met 324 lede die grootste was. Streek Oos -Rand het gevolg met 228 lede en streek Pretoria 206 lede.

Meneer die Voorsitter, hierdie statistiek laat my terug dink aan Sawa se situasie waar ons vandag staan. Dit is duidelik dat Sawa sy toppunt bereik het in 1992 toe die ledetal op 1 989 gedraai het. Dit was ook die jaar waar Sawa se eerste twee vroue voorsitters verkies is. Een van hulle is vandag steeds hier teenwoordig en ek kan nie anders as om vir Frieda Burger te bedank vir haar lojaliteit teenoor Sawa nie.

As ons dus vandag hand in eie boesem moet steek en moet besin hoe ons Sawa die toekoms in gaan neem sal ons beslis die wysheid van Salomo nodig hê.

Ons en die Sawanante voor ons het Sawa se basis gevestig met 'n sterk Grondwet en goeie administratiewe riglyne. Dit alreeds spreek boekdele dat 'n ontpannings organisasie steeds na 50 jaar

bestaan. Dit sal egter van ons almal vandag hier in hierdie saal afhang hoe en wat ons met Sawa gaan doen om ons organisasie se voortbestaan te verseker.

Ons besture op streek en nasionale vlak sal na my mening moet besin oor 'n paar aspekte wat ons toekoms sal verseker. Hier moet ek die huidige Dagbestuur en NUB gelukwens dat u die bal aan die rol gesit het hierdie jaar met 'n strategiese beplanning en 'n komitee wat vir ons riglyne en voorstelle op die tafel moet sit om die pad vorentoe te bepaal.

Die eerste aspek wat al na vore gekom het uit hierdie beplanning, is dat ons sal moet besin oor kommunikasie binne Sawa in die geheel. Met die nuwe kommunikasie middels in hierdie tyd tot ons beskikking moet ons dit beslis tot ons voordeel op elke vlak gebruik. Die streek waar ek tans betrokke is het hierdie jaar twee "whatsapp" groepe gestig en het wondere verrig om die streek se aktiwiteite onder al die lede, sowel as die bestuur se aandag te bring.

Die samehorigheidsgevoel wat dit onder die lede gevestig het was merkwaardig.

Ek wil dus aan al die streke en besture vandag 'n beroep doen om hierdie applikasie in u streke te implementeer .

Ons besture staan vandag ook voor groot uitdagings om ons huidige finansiële situasie oordeelkundig te bestuur en te beplan. Brandstofpryse is besig om drasties te verhoog en woonwaparktariewe is ook besig om sterk te styg. Dit veroorsaak dat ons lede deeglik moet beplan om saamtrekke by te woon. Hier wil ek 'n beroep doen op ons Streekbesture om u saamtrekbeplanning met bogenoemde in gedagte, behoorlik te oorweeg om dit vir ons lede steeds moontlik te maak om saamtrekke by te woon.

As die nuutste ledeontleding ontleed word kan gesien word dat 47 % van Sawa se lede bo die ouderdom van 60 jaar is en dus as Senior Burgers geklassifiseer word. Hierdie persentasie verskil egter van streek tot streek maar ons streekbesture sal moet besin oor die ouderdom van die lede in hul streek en sal behoorlik moet beplan om ook ons Senior Burgers te akkommodeer met streek aktiwiteite. Daar is nog vele uitdagings wat ons almal in die gesig staar asook aspekte wat die doeltreffende bestuur en volhoubaarheid van

Sawa moet verseker, maar ek weet met die kundigheid van u almal vandag hier teenwoordig asook met die hulp van al die besture in die strukture van Sawa sal ons hierdie uitdagings hanteer en sodoende verseker dat Sawa sal voortbestaan.

Mnr die Voorsitter, ten spyte van finansiële beperkings, 'n ekonomiese wat sukkel om groei te toon, asook 'n wankelrige woonwavervaardigings bedryf, is ek steeds optimisties oor ons organisasie en die doel waaroer Sawa gestig is. Ons gaan volgende jaar ons 50ste bestaansjaar vier en ek is geweldig opgewonde daaroor en oor die toekoms van ons organisasie.

Daar lê vir ons almal harde werk voor maar soos ek ons Sawanante oor die jare leer ken het sal ons die toekoms van Sawa verseker.

Mnr die Voorsitter, ek sluit af om al ons Sawanante te bedank vir u onbaatsugtige diens en lojaliteit wat u aan ons organisasie lewer. Dit is lede soos u net soos die lede voor u wat Sawa deur die jare gedra het wat sal verseker dat Sawa volgende jaar 'n groot mylpaal bereik en Sawa in 'n nuwe era sal inneem.

Met hierdie woorde verklaar ek hierdie 42ste Kongres van die Suid – Afrikaanse Woonwa Assosiasie as geopen.

Ek dank u.

Nico & Sarie Spaumer, Presidentspaar

